



TERENGGANU DARUL IMAN

TAMBAHAN PERUNDANGAN

AKTA KERAJAAN TEMPATAN 1976

Tr. P.U. 13/93

**UNDANG-UNDANG KECIL PASAR
(MAJLIS DAERAH DUNGUN) 1992**

Tarikh penyiaran :

8 Julai 1993

Tarikh mula berkuatkuasa :

8 Julai 1993

SUSUNAN UNDANG-UNDANG KECIL

Mukadimah

- Undang-undang kecil 1. Nama pemakaian dan tarikh berkuatkuasa.
- Undang-undang kecil 2. Tafsiran.
- Undang-undang kecil 3. Lesen bagi pasar persendirian.
- Undang-undang kecil 4. Kehendak-kehendak di dalam bangunan yang dilesenkan untuk pasar persendirian.
- Undang-undang kecil 5. Kehendak-kehendak untuk penjualan ikan dan daging.
- Undang-undang kecil 6. Pembekalan air.
- Undang-undang kecil 7. Kehendak-kehendak kebersihan.
- Undang-undang kecil 8. Syarat-syarat pengeluaran lesen pasar persendirian.
- Undang-undang kecil 9. Pelesenan penjual-penjual di pasar awam.
- Undang-undang kecil 10. Mempamerkan lesen.
- Undang-undang kecil 11. Pemilik gerai hendaklah hadir di gerai atau di petaknya.
- Undang-undang kecil 12. Peruntukkan tempat jualan.
- Undang-undang kecil 13. Masa buka pasar awam.
- Undang-undang kecil 14. Penggunaan air.
- Undang-undang kecil 15. Mempamerkan tanda harga.

Undang-undang kecil 16. Mengembongkan daging.
Undang-undang kecil 17. Hanya daging yang disembelih di rumah sembelih yang dilesenkan dibenarkan dijual.
Undang-undang kecil 18. Penjualan makanan yang tidak berkhasiat adalah dilarang.
Undang-undang kecil 19. Tanggungjawab pemegang lesen atau penerima pajakan.
Undang-undang kecil 20. Pembersihan gerai-gerai.
Undang-undang kecil 21. Cucian harian gerai daging dan ikan.
Undang-undang kecil 22. Sekeliling gerai hendaklah dibersihkan.
Undang-undang kecil 23. Kebersihan pasar dan gerai.
Undang-undang kecil 24. Alat-alat dan makanan hendaklah dijaga.
Undang-undang kecil 25. Pembuangan sampah-sarap.
Undang-undang kecil 26. Halangan pengalihan dan penjualan.
Undang-undang kecil 27. Halangan longkang dan laluan.
Undang-undang kecil 28. Pelindung sinar matahari dan perubahan.
Undang-undang kecil 29. Larangan menggunakan kereta tolak yang beroda.
Undang-undang kecil 30. Kemasukan kenderaan.
Undang-undang kecil 31. Api.
Undang-undang kecil 32. Menyalah gunakan gerai.
Undang-undang kecil 33. Kacau ganggu.
Undang-undang kecil 34. Larangan meminta sedekah dan mempamirkan luka.
Undang-undang kecil 35. Orang yang berpenyakit.
Undang-undang kecil 36. Gangguan alat-alat elektrik dan air.
Undang-undang kecil 37. Kuasa untuk memeriksa.
Undang-undang kecil 38. Kuasa untuk menghalang orang yang melanggar peraturan dan menamatkan pajakan.
Undang-undang kecil 39. Pemasangan dan penyambungan alat-alat letrik.
Undang-undang kecil 40. Lesen dan bayaran.
Undang-undang kecil 41. Kecuali.
Undang-undang kecil 42. Penalti.
Undang-undang kecil 43. Pemansuhan.

JADUAL PERTAMA

JADUAL KEDUA

JADUAL KETIGA

JADUAL KEEMPAT

Mukadimah

Pada menjalankan kuasa-kuasa yang diberi oleh seksyen 73 Akta Kerajaan Tempatan 1976 [Akta 171], Majlis Daerah Dungun membuat, dan menurut seksyen 103 Akta tersebut, Pihak Berkuasa Negeri mengesahkan, Undang-Undang kecil berikut:-

1. Nama, pemakaian dan tarikh berkuatkuasa.

Undang-Undang Kecil ini bolehlah dinamakan **Undang-undang Kecil Pasar (Majlis Daerah Dungun) 1992** dan hendaklah dipakai untuk semua kawasan di dalam Majlis Daerah Dungun dan hendaklah mula kuatkuasanya pada tarikh disiarkan dalam *Warta*.

2. Tafsiran.

Dalam undang-undang kecil ini, melainkan jika kandungan ayatnya menghendaki makna yang lain: -

“gerai” termasuk petak, bangkuk dan bilik ruang;

“Majlis” ertinya Majlis Daerah Dungun;

“pasar” ertinya sesuatu tempat awam biasanya digunakan untuk menjual haiwan atau daging, ikan, buah-buahan, sayur-sayuran atau lain-lain barang makanan manusia yang mudah musnah dan untuk menjual apa-apa pakaian atau lain-lain barang-barang dagangan dan termasuklah semua tanah dan premis yang digunakan dengan apa-apa cara bersama-sama, berkenaan atau bersangkutan dengannya;

“pasar awam” ertinya sebuah pasar yang dipunyai, dipajakan atau diselenggarakan oleh Majlis.

“pasar persendirian” ertinya sebuah pasar yang lain daripada pasar awam dan termasuk pasar mini dan pasar raya.

“pemilik gerai” bagi pasar awam ertinya seseorang di dalam yang dilesenkan oleh Yang Dipertua untuk menjual di dalam pasar awam itu, dan bagi pasar persendirian ertinya seseorang yang dibenarkan oleh pemilik pasar tersebut untuk menjual di dalam pasar itu dan di dalam kedua-dua keadaan termasuklah Timbalan Yang Dipertua.

“petak” ertinya mana-mana kawasan yang telah ditetapkan dalam lengkungan pasar;

“Yang Dipertua” ertinya Yang Dipertua, Majlis Daerah Dungun dan termasuklah Timbalan Yang Dipertua;

3. Lesen bagi pasar persendirian.

Tiada seseorang pun boleh mewujudkan, menjalankan atau memulakan pasar persendirian di mana-mana tempat, pegangan atau bangunan tanpa satu lesen yang dikeluarkan oleh Yang Dupertua di bawah undang-undang kecil ini.

4. Kehendak-kehendak di dalam bangunan yang dilesenkan untuk pasar persendirian.

Bangunan di mana pasar persendirian yang hendak diwujudkan, dijalankan atau dimulakan mestilah mematuhi kehendak-kehendak berikut:-

- (a) dinding mestilah disudahkan dengan permukaan yang licin yang boleh dengan senangnya dan dengan cepatnya dicuci tanpa unjuran atau penyudahan atau sudut yang berkemungkinan akan mengumpulkan debu.
- (b) lantai mestilah diperbuat dari bahan kuat dan tidak boleh ditelusi yang disudahkan dengan licin dan yang ditingkatkan supaya kesemua cecair boleh dengan mudahnya mengalir ke longkang.
- (c) longkang mestilah dibuat dengan batu bata dan digariskan dengan simen dengan separuh bulatan di bawah atau dengan separuh paip yang diperbuat daripada tanah liat yang tidak boleh ditembusi dan mestilah berukuran tidak kurang daripada 15.24 centimeter garis pusatnya dan mestilah mencukupi bilangannya dan curamannya sehingga membolehkan pengaliran semua air dan cecair-cecair yang lain. Longkang-longkang ini melainkan yang merintang kaki lima mestilah hanya ditutupi oleh papan yang boleh dialih atau bahan lain dan mestilah tidak ditutupi oleh benda-benda atau bahan-bahan lain yang berat. Tiada longkang atau paip untuk pengaliran air hujan yang lebat atau air mandi atau air najis atau benda kotor selain dari paip tanah yang dibuat dengan elok diletakkan melalui premis-premis.
- (d) lantai di tingkat atas mestilah dibina dengan elok dengan konkrit simen atau dengan papan lantai yang rapat dan dilurahkan atau sebaliknya dihubungkan dengan serapat-rapatnya supaya tidak diresapi air.

5. Kehendak-kehendak untuk penjualan ikan dan daging.

- (1) Di dalam mana-mana pasar persendirian di mana daging atau ikan dibelah, dicuci, dipotong, disimpan, dipamerkan atau ditunjukkan atau dijual, dinding mestilah dibina sehingga tingginya 1.83 meter dari lantai dan mestilah dipermukaannya ditutupi dengan jubin putih yang gemerlap batu-bata yang gemerlap atau lain-lain bahan yang tidak boleh ditelusi yang diluluskan oleh Yang Dipertua.
- (2) Semua meja, kaunter, bangku atau almari kaca untuk mempamerkan mana-mana daging atau ikan untuk dijual bolehlah ditutupi dengan batu marmar, jubin putih yang gemerlap atau kaca dan mestilah dibasuh dengan sabun dan air sekurang-kurangnya sekali dalam sehari.
- (3) Semua meja, kaunter, bangku atau almari kaca untuk mempamerkan buah-buahan atau sayur-sayuran yang mentah untuk dijual mestilah dibasuh dengan sabun dan air sekali dalam sehari.
- (4) Setiap penyangkut untuk menggantung mana-mana daging atau ikan yang dipamerkan untuk dijual mestilah dibelakangkan sekurang-kurangnya 1.067 meter dari serambi atau kaki lima dan mestilah tahan karat dan ditukarkan apabila diarah oleh Yang Dipertua.
- (5) Buah-buahan, sayur-sayuran atau lain-lain barang makanan manusia yang mudah musnah, mestilah tidak boleh dipamerkan untuk dijual di atas meja kaunter atau bangku yang sama yang telah dikhaskan untuk daging atau ikan.
- (6) Peti air batu yang bentuknya diluluskan mestilah dipasang jika diarahkan oleh Yang Dipertua.

6. Pembekalan air.

Di dalam mana-mana pasar persendirian pemegang lesen hendaklah menjaminkan bahawa;

- (a) sentiasa ada di atas premis bekalan air yang bersih dan baik dari pembekalan air awam;
- (b) di tempat-tempat yang tidak ada bekalan air awam, air telaga yang disahkan bersih dan selamat oleh Yang Dipertua boleh digunakan.

7. Kehendak-kehendak kebersihan.

Pemegang lesen sesuatu pasar persendirian hendaklah mematuhi keperluan-keperluan berikut:

- (a) dia hendaklah menyebabkan segala sampah sarap dan kotoran dipungut dan diisikan di dalam bekas yang bertudung yang dibekalkan untuk maksud itu dan bekas-bekas itu dikosongkan dan dicuci sebanyak kali yang diperlukan untuk menjadikan premis pada setiap masa bersih dan baik, tetapi tidak kurang dari sekali sehari.
- (b) dalam masa-masa tertentu seperti yang boleh diarahkan oleh Yang Dipertua, dia hendaklah menyebabkan semua barang yang mudah alih dipindahkan dari premis yang dilesenkan dan dinding, lantai, siling dan bumbung dibersihkan dan segala kotoran dan sampah-sarap dibuang, dan keseluruhan premis dengan lengkap dicuci, dicat atau dibasuh dengan kapur dan kesemua pembaikan yang perlu hendaklah dilakukan terhadap premis itu.
- (c) dia hendaklah menyebabkan semua makanan yang dimaksudkan untuk dijual disimpan di dalam keadaan yang bersih dan dijaga dengan berkesanya dari lalat, vermin, serangga, debu Lumpur atau benda-benda, bahan-bahan atau barang-barang lain yang merbahaya.
- (d) dia hendaklah menyebabkan semua perkakas yang digunakan di premis di dalam keadaan yang bersih dan bebas dari keladok atau penjangkitan yang merbahaya.
- (e) dia hendaklah menjamin tiada alat tilam atau bantal atau pakaian ada digantung atau disimpan di mana-mana bahagian premis itu.

8. Syarat-syarat pengeluaran lesen pasar persendirian.

- (1) Yang Dipertua boleh mengeluarkan lesen-lesen untuk mewujudkan, menjalankan atau memulakan pasar-pasar persendirian mengikut apa-apa had dan syarat yang difikirkan patut olehnya.
- (2) Dengan tidak menyentuh keluasan perenggan (1), Yang Dipertua boleh mengenakan apa-apa had dan syarat berkenaan:-
 - (a) bilangan maksimum gerai-gerai petak-petak atau lot-lot yang boleh diwujudkan atau dibahagikan di dalam lengkungan pasar persendirian itu;
 - (b) kedudukan di dalam kawasan lengkungan pasar persendirian itu di mana gerai-gerai atau petak-petak boleh diwujudkan atau ditandakan;

- (c) jenis makanan yang dimasak atau yang mentah, minuman atau barang-barang yang dijual atau hendak dijual di tiap-tiap bahagian atau sebahagian pasar persendirian; dan
- (d) apa-apa kehendak-kehendak yang lain, yang difikirkan perlu oleh Yang Dipertua.

9. Perlesenan penjual-penjual di pasar awam.

- (1) Tiada seorang pun di dalam mana-mana pasar awam boleh menjual atau mempamerkan atau menyimpan untuk dijual binatang-binatang atau daging, ikan, ternakan, buah-buahan, sayur-sayuran atau benda-benda makanan manusia yang mudah musnah atau apa-apa pakaian barang-barang dagangan atau apa-apa barang lain kecuali di dalam gerai atau petak yang mana ia telah diberi satu lesen oleh Yang Dipertua.
- (2) Yang Dipertua hendaklah menyelenggarakan satu Daftar mengandungi butir-butir yang berkaitan mengenai orang-orang yang telah diberikan lesen-lesen untuk gerai-gerai atau petak-petak di dalam pasar awam.

10. Mempamerkan lesen.

Pemegang lesen:-

- (a) sesebuah pasar persendirian hendaklah pada setiap masa mempamerkan lesennya di suatu tempat yang senang dilihat di dalam premis itu;
- (b) sesebuah gerai di pasar awam hendaklah pada setiap masa mempamerkan lesennya di suatu di suatu tempat yang senang dilihat di gerai itu;
- (c) sesebuah petak gerai di pasar awam hendaklah pada setiap masa menyimpan lesen di suatu tempat yang membolehkannya menunjuk lesen itu bila diminta.

11. Pemilik gerai hendaklah hadir di gerai atau dipetaknya.

(1) Pemilik gerai mana-mana pasar awam hendaklah pada setiap masa berada dan menjalankan atau mengawasi penjualan di gerainya atau petaknya kecuali tidak dapat berbuat demikian oleh sebab-sebab yang munasabah.

(2) Pemilik gerai di mana-mana pasar awam boleh, dengan kebenaran bertulis dari Yang Dipertua mengambil kerja seorang pembantu yang mana nama serta gambarnya hendaklah ditampal di lesen di bawah nama dan gambar pemegang lesen.

(3) Jika seseorang pemilik gerai di mana-mana pasar awam meninggalkan gerai atau petaknya untuk tempoh selama tiga puluh hari atau lebih, dia hendaklah melantik seorang pengganti tempatnya dengan kebenaran bertulis terlebih dahulu dari Yang Dipertua.

(4) Yang Dipertua tidak boleh, melainkan di dalam keadaan-keadaan yang difikirkan patut, memberi apa-apa kebenaran di bawah peruntukkan-peruntukkan perenggan (3) bagi tempoh yang melebihi tiga bulan.

(5) Bayaran sebanyak \$5.00 hendaklah di bayar oleh pemilik gerai untuk kebenaran melantik seorang pengganti.

(6) Tiada seorang pemilik gerai di mana-mana pasar awam boleh menyerahkan, memajak, memberi sewa atau memberi sewa kecil gerainya.

12. Peruntukkan Tempat Jualan.

Yang Dipertua, di dalam hal pasar awam, dua pemegang lesen, dalam hal pasar persendirian boleh menguntukkan bahagian-bahagian atau sebahagian tempat yang berlainan di pasar awam atau pasar persendirian, mengikut mana-mana yang berkenaan, untuk penjualan atau menjual apa-apa makanan, minuman, barang-barang atau benda-benda selain daripada di tempat atau bahagian yang telah diuntukkan bagi maksud itu.

13. Masa buka pasar awam.

Pasar awam hendaklah dibuka di waktu-waktu sebagaimana diarahkan oleh Yang Dipertua, dan kecuali dengan kebenaran khas oleh Yang Dipertua, tiada seorang pun boleh berada di pasar awam di waktu-waktu pasar itu di tutup.

14. Penggunaan air.

(1) Di mana pembekalan air diperuntukkan di pasar awam., tiada seorang pun dibenarkan menyebabkan pembaziran air dan setiap orang hendaklah mematuhi arahan-arahan terhadap penggunaan air yang diberikan oleh Yang Dipertua atau mana-mana orang yang diberikuasa olehnya secara bertulis.

(2) Tiada seorang pun pemilik gerai atau mana-mana orang yang berhubung dengan penjualan makanan atau minuman boleh menyediakan untuk minuman atau digunakan untuk memasak atau membasuh atau untuk apa-apa tujuan lain yang berhubung dengan perniagaannya mana-mana air dari mana-mana saluran atau sumber-sumber yang lain di dalam kawasan kemudahan awam tau persendirian atau tandas.

15. Mempamerkan tanda harga.

Setiap pemilik gerai hendaklah mempamerkan dengan cara yang mudah kelihatan digerainya tanda-tanda harga untuk setiap barang yang dipamerkan.

16. Mengembongkan daging.

Tiada seorang pun memasukkan air atau cecair lain ke dalam mana-mana daging yang dimaksudkan untuk dijual mahupun mengembongnya dengan angin, dan tiada seorang pun boleh menjual atau menawar atau mempamer untuk dijual atau menyebabkan terjadi satu tawaran atau pameran mana-mana daging yang dikembongkan dengan angin atau di mana air atau cecair lain telah dimasukkan.

17. Hanya daging yang disembelih di rumah sembelih yang dilesenkan dibenarkan dijual.

Kecuali rusa atau binatang-binatang liar yang lain, tiada seorang pun boleh menjual atau mempamerkan untuk dijual atau menyebabkan dijual atau ditawarkan atau dipamerkan untuk dijual mana-mana bahagian dari apa-apa binatang yang telah disembelih di tempat lain selain daripada rumah sembelih yang telah dilesenkan.

18. Penjualan makanan yang tidak berkhasiat adalah dilarang.

(1) Tiada seorang pun boleh mempamirkan untuk jualan atau menjual di mana-mana pasar apa-apa barang makanan manusia atau minuman yang tidak berkhasiat.

(2) Yang Dipertua atau Pegawai Kesihatan atau mana-mana binatang, burung, daging ikan, buah-buahan atau sayur-sayuran yang tidak berguna lagi, berkhasiat atau apa-apa jua yang tidak sesuai untuk makanan manusia. Jika pada pendapat Pegawai Kesihatan barang-barang yang dirampas patut dimusnahkan maka barang-barang itu hendaklah dimusnahkan, dengan serta merta.

(3) Satu resit hendaklah dikeluarkan untuk barang-barang yang dirampas di bawah perenggan (2), dan resit itu mestilah diberi kepada orang yang barang-barang dirampas, atau jika orang itu tidak boleh dikesan, mestilah ditinggal di tempat perampasan itu.

(4) Di mana barang-barang dimusnahkan di bawah perenggan (2), dan resit itu mestilah diberi kepada orang yang barang-barang dirampas, atau jika orang itu tidak boleh dikesan, mestilah ditinggal di tempat perampasan itu.

19. Tanggungjawab pemegang lesen atau penerima pajakan.

(1) Pemegang lesen mana-mana pasar persendirian atau di dalam hal di mana pasar awam atau mana-mana bahagiannya dipajakan, penerima pajakan pasar awam, hendaklah mengambil kerja sebilangan orang yang mencukupi untuk membersihkan dan menjaga pasar menjadi bersih sehingga memuaskan Yang Dipertua.

(2) Penerima pajakan pasar awam hendaklah bertanggungjawab ke atas segala kerosakan kepada atau kehilangan ke atas mana-mana harta majlis dalam pasar itu.

20. Pembersihan Gerai

Pemilik setiap gerai hendaklah menjaganya menjadi bersih dan di dalam keadaan yang baik dan pada satu hari di didalam satu-satu minggu yang akan ditetapkan oleh Yang Dipertua, pemilik gerai hendaklah mengalih semua barang-barang atau benda-benda kepunyaan mereka dari gerai dan hendaklah mencuci gerai secukup-cukupnya.

21. Cucian harian gerai daging dan ikan.

Setiap peniaga ikan dan daging di pasar awam hendaklah membasuh dan mencuci dengan bersungguh-sungguh gerai, blok gerai, papan gerai serta semua alat-alat dan perkakas-perkakas kepunyaannya sekurang-kurangnya sekali sehari dan hendaklah menjaga semuanya ini di dalam keadaan bersih dan bebas dari kekotoran kuman.

22. Sekeliling gerai hendaklah dibersihkan.

Setiap pemilik gerai di pasar awam hendaklah menjaga mana-mana jalanraya, lorong atau kawasan yang berhampiran di hadapan, belakang atau di sebelah gerai atau petaknya di dalam keadaan bersih yang memuaskan Yang Dipertua.

23. Kebersihan pasar dan gerai.

Setiap pemilik gerai di dalam pasar awam atau pasar persendirian hendaklah menjaga bangsal, gerai, kandang ternakan atau tempatnya dan kawasan sekitarnya di dalam keadaan yang bersih dan bebas dari kekotoran dan kuman.

24. Alat-alat dan makanan hendaklah dijaga.

Setiap pemilik gerai hendaklah:-

(a) menyimpan semua makanan, samada yang telah atau yang belum dimasak di dalam keadaan yang bersih dan menyihatkan supaya benda ini tidak akan dihinggap oleh lalat, vermin, serangga, debu, Lumpur atau lain-lain benda, barang atau bahan yang merbahaya;

(b) membungkus semua makanan untuk pembeli-pembeli dengan kertas atau bahan lain yang bersih dan bebas dari apa-apa kotoran;

(c) menjaga semua-alat-alat dan perkakas-perkakas yang digunakan berhubung dengan perniagannya dengan bersih dan bebas dari apa-apa kotoran;

(d) memelihara diri dan pakaian di dalam keadaan yang bersih; dan

(e) mengecat gerainya seperti yang diarahkan oleh Yang Dipertua.

25. Pembuangan sampah-sarap.

(1) (a) setiap pemilik gerai hendaklah mengadakan dan menjaga di dalam keadaan yang baik mengenai gerainya beberapa bilangan tempat buangan sampah yang elok dan yang bertutup yang mana bentuk dan bahannya diluluskan oleh Yang Dipertua.

(b) tiada pemilik gerai atau orang lain boleh mengumpul atau menyebabkan atau membenarkan pengumpulan apa-apa sampah, kotoran, sampah-sarap atau benda atau bahan yang dibuang olehnya di merata tempat selain dari di dalam tempat membuang sampah.

(c) semua kotoran yang busuk dan mudah reput atau yang pejal hendaklah disikan di dalam beg plastik atau lain-lain bekas yang ringan sebagaimana yang dibenarkan oleh Yang Dipertua, sebelum ianya dikumpulkan di dalam tempat membuang sampah .

(d) setiap pemilik gerai hendaklah menentukan yang kesemua sampah-sarap yang dihimpun semasa di dalam perjalanan perniagaannya dikumpulkan dari semasa ke semasa di dalam tempat membuang sampah awam yang disediakan bagi maksud ini.

(e) tiada seorang pemilik gerai boleh menyebabkan atau membenarkan dikumpul, ditumpah, ditabur atau dibuang, apa-apa darah, air masin, sisa cecair atau lain-lain bahan yang mengeluarkan bau busuk, ke dalam mana-mana longkang atau di atas mana-mana lantai pasar melainkan di tempat-tempat yang dikhaskan untuk tujuan itu oleh Yang Dipertua.

(2) Jika di dalam mana-mana tindakan kerana melanggar perenggan kecil (b) undang-undang kecil ini dibuktikan bahawa apa-apa sampah, kotoran, sampah-sarap atau benda atau bahan lain tidak dikumpul di dalam tempat membuang sampah tetapi di dalam atau di atas mana-mana laluan, longkang, halaman atau lain tempat yang berhampiran di hadapannya di belakang atau di tepi sebuah gerai atau petak, ia hendaklah dianggap, melainkan dibuktikan di sebaliknya, iaitu yang sama telah dikumpulkan di dalam atau di atas, di situ oleh atau dengan kebenaran oleh pemegang gerai di mana gerai atau petaknya yang terletak paling dekat dengan sampah kotorann, sampah-sarap atau benda atau lain bahan itu.

26. Halangan pengalihan dan penjualan.

(1) Tiada seorang pemilik gerai di mana-mana pasar awam boleh:-

- (a) menempatkan, mendirikan atau meletakkan gerainya atau petaknya melebihi kawasan yang telah ditentukan untuknya dan tiada ebek atau penutup boleh melebihi 30 sentimeter dari gerai atau petak.
 - (b) menyebabkan atau membenarkan apa-apa barangnya, barang dagangannya atau lain-lain benda, perkakas-perkakas atau benda-benda yang berkaitan dengan perniagaannya dikumpulkan, dipamirkan untuk dijual di atas mana-mana tangga, ruang lorong atau jalan atau jalan di dalam pasar itu atau di atas atau melintangi mana-mana longkang atau sebahagian darinya di dalam pasar itu.
 - (c) menyebabkan atau membenarkan barang-barang dagangan, barang atau benda-benda yang lain, perkakas-perkakas atau benda yang berkaitan dengan perniagannya terkeluar melebihi had gerai atau petak yang telah ditentukan untuknya.
 - (d) menyebabkan apa-apa halangan di dalam mana-mana pasar atau mana-mana jalan, lorong atau jalan masuk ke mana-mana pasar dengan apa-apa kenderaan, barang-barang, kotak, bakul, kereta sorong beroda satu atau benda-benda yang lain;
 - (e) mendirikan apa-apa kotak, rak, para atau lain-lain binaan di atas gerai atau petaknya yang tingginya melebihi 2.4 meter dari paras tanah atau menimbun atau melonggok barang-barang kotak-kotak, bakul-bakul, bungkusan-bungkusan atau lain barang di atas gerai atau petak melebihi had tinggi itu.
- (2) Mana-mana pegawai penguatkuasa atau mana-mana orang yang diberi kuasa secara bertulis bagi maksud itu oleh Yang Dipertua boleh mengalihkan apa-apa benda yang menyebabkan penghalangan dan juga boleh merombak apa-apa binaan yang menyalahi undang-undang kecil ini.
- (3)
- (a) benda-benda yang dialih boleh diletakkan di bawah jagaan Majlis dan pemunya-pemunya benda-benda itu boleh dalam tempoh 21 hari dari tarikh pengalihan itu menuntut milik benda itu daripada Yang Dipertua setelah dibayar kepada Yang Dipertua belanja pengalihan dan menjaga benda itu.
 - (b) tiap-tiap bayaran yang diterima di bawah perenggan kecil (a) perenggan (3) hendaklah dimasukkan ke dalam dan menjadi sebahagian daripada Kumpulan Wang Majlis Daerah Dungun dan suatu resit rasmi hendaklah dikeluarkan kepada orang yang hendaklah dikeluarkan kepada orang yang daripadanya bayaran diterima.
- (4) Yang Dipertua boleh pada bila-bila masa, menjual atau melupuskan dengan caranya sendiri benda-benda yang dialih itu jika benda itu ialah dari jenis yang tidak tahan lama dan di dalam lain-lain al selepas tempoh 21 hari dan hasilan dari penjualan itu hendaklah dipulangkan kepada pemunya atau pemunya-pemunya dengan ditolak belanja yang tersebut di dalam perenggan kecil (a) perenggan 3, undang-undang kecil ini; dan jika sekiranya pemunya benda itu tidak dapat dipastikan, hasilan yang disebutkan itu boleh dikreditkan kepada hasilan Majlis ini selepas 3 bulan dari tarikh penjualan itu.

(5) Yang Dipertua Majlis tidaklah bertanggungjawab ke atas apa-apa kerosakan atau kehilangan yang berlaku kepada benda itu dalam masa pengalihannya dan juga semasa di dalam jagaan pihak Majlis.

27. Halangan longkang dan laluan.

Tiada seorang pun boleh mempamerkan apa-apa barang untuk dijual di atas laluan atau di atas mana-mana longkang di dalam kawasan pasar, dan tiada papan, kotak, bakul atau apa-apa barang lain boleh ditinggalkan di dalam, di atas atau merintang di mana-mana parit atau laluan itu.

28. Pelindung sinar matahari.

Tiada seorang pun boleh membina apa-apa pelindung sinar matahari, dinding, atau sekatan atau membuat apa-apa perubahan atau tambahan terhadap mana-mana gerai tanpa satu kebenaran bertulis Yang Dipertua.

29. Larangan menggunakan kereta tolak yang beroda.

Tiada seorang pun boleh menggunakan kereta tolak atau troli dengan roda besi untuk tujuan mengangkat barang-barang di dalam mana-mana pasar awam.

30. Kemasukan kenderaan.

Tiada seorang pun boleh memandu mana-mana kenderaan berenjin atau membawa mana-mana basikal ke dalam mana-mana pasar awam kecuali dibenarkan secara bertulis oleh Yang Dipertua.

31. Api.

(1) Tiada api boleh dinyalakan atau memasak atau merebus boleh dilakukan di dalam mana-mana pasar, kecuali di tempat-tempat yang ditentukan oleh Yang Dipertua dan tertakluk kepada syarat-syarat yang ditetapkan olehnya.

(2) Tiada boleh membuang bulu ayam, itik di mana-mana pasar, kecuali di tempat atau tempat-tempat sebagaimana yang ditentukan oleh Yang Dipertua tertakluk kepada syarat-syarat yang ditetapkan olehnya.

32. Menyalah gunakan gerai.

Tiada seorang pun boleh duduk, berdiri, berbaring atau tidur di mana-mana gerai di dalam mana-mana pasar.

33. Kacau ganggu.

Tiada seorang pun di dalam pasar boleh:-

- (a) melakukan kacau ganggu;
- (b) meludah di atas lantai, gerai atau lain-lain bahagian pasar;
- (c) membuang mana-mana sayur, bahan binatang, sisa-sisa, sampah sarap atau benda atau barang lain yang mengeluarkan bau di atas mana-mana gerai, jalanraya, laluan, tangga-tangga atau mana-mana bahagian pasar kecuali ke dalam tempat atau bekas membuang sampah.
- (d) Memelihara anjing atau binatang-peliharaan, atau membawa masuk ke dalam pasar anjing atau binatang peliharaan yang diikatkan atau tidak, atau dengan sengaja membiarkan atau membenarkan anjing atau binatang peliharaan mengikutnya ke dalam pasar.

34. Larangan meminta sedekah dan mempamirkan luka.

Tiada seorang di dalam pasar boleh meminta sedekah atau meminta derma atau mempamirkan atau menunjukkan apa-apa luka, kecederaan, penyakit di badan atau

kecacatannya, Pegawai-pegawai Majlis hendaklah mengusir orang-orang ini dari pasar itu dan tiada seorang pun yang sedemikian keadaanya boleh menjalankan atau membantu di dalam apa-apa perniagaan di dalamnya.

35. Orang yang berpenyakit.

Tiada seorang yang mengidap mana-mana penyakit yang berjangkit boleh menjalankan apa-apa penjualan di dalam mana-mana pasar; dan mana-mana orang yang sedemikian hendaklah apabila dikehendaki berbuat demikian oleh Yang Dipertua, menghadirkan diri untuk satu pemeriksaan kesihatan.

36. Gangguan alat-alat elektrik dan air.

Tiada seorang boleh merosakkan atau mengganggu mana-mana alat elektrik dan air di dalam mana-mana pasar awam.

37. Kuasa untuk memeriksa.

Tiada seorang boleh menghalang mana-mana pegawai yang diberi kuasa oleh Yang Dipertua daripada memasuki atau memeriksa mana-mana bahagian pasar pada bila-bila masa yang munasabah.

38. Kuasa untuk menghalau orang yang melanggar peraturan dan menamatkan pajakan.

Yang Dipertua boleh menghalau atau menyebabkan terhalaunya dari mana-mana pasar awam mana-mana orang atau pekerja-pekerjanya yang disabitkan dengan mana-mana kesalahan atau yang tidak mematuhi mana-mana undang-undang kecil ini mengenai pasar dan boleh melarang orang-orang itu atau pekerja-pekerjanya dari menjalankan apa-apa perniagaan atau apa-apa tred seterusnya atau menghuni mana-mana gerai, kedai atau lain-lain tempat di dalamnya, dan boleh menamatkan mana-mana pajakan atau pemilikan yang dipunyai mengenai apa-apa gerai, kedai atau lain-lain tempat.

39. Pemasangan dan penyambungan alat-alat lektrik.

Tiada lat-alat atau penyambungan elektrik boleh dipasang atau disambung oleh pemilik gerai di pasar awam tanpa terlebih dahulu mendapat satu kebenaran bertulis dari Yang Dipertua. Pemilik gerai hendaklah menanggung kesemua perbelanjaan pemasangan-pemasangan wayar atau penyambungan itu.

40. Lesen dan bayaran.

(1) Lesen yang dikeluarkan oleh Majlis hendaklah seperti di dalam Jadual Pertama tetapi ianya boleh dibahsuai jika perlu.

(2) Bayaran yang kena dibayar untuk suatu lesen di dalam pasar awam untuk sebuah gerai atau sebuah ruang kedai adalah seperti di dalam Jadual Kedua.

(3) Bayaran yang kena dibayar untuk suatu lesen bagi sebuah pasar persendirian adalah seperti di dalam Jadual Ketiga.

(4) Bayaran yang kena dibayar oleh penjual-penjual di pasar awam hendaklah seperti di dalam Jadual Keempat.

(5) Semua wang yang dipungut di bawah undang-undang kecil ini hendaklah dimasukkan dan menjadi sebahagian daripada Kumpulan Wang Majlis Daerah Dungun.

41. Kecuali.

Walau apa pun peruntukkan-peruntukkan undang-undang kecil ini, apa-apa lesen yang dikeluarkan di bawah peruntukkan-peruntukkan undang-undang kecil yang terdahulu hendaklah terus berkuatkuasa sehingga lput atau dimansuhkan oleh Yang Dipertua.

42. Penalti.

Seseorang yang melanggar mana-mana undang-undang kecil ini atau mana-mana syarat di dalam sesuatu lesen atau mana-mana notis atau perintah Yang Dipertua adalah melakukan suatu kesalahan dan apabila disabitkan, bolehlah dikenakan denda tidak lebih dari dua ribu ringgit atau penjara selama tempoh tidak lebih daripada satu tahun atau kedua-dua denda dan penjara dan jika kesalahan itu yang berlanjutan, denda

yang tidak melebihi dua ratus ringgit bagi tiap hari kesalahan itu berterusan dilakukan selepas sabitan bolehlah dijatuhkan.

43. Pemansuhan.

Peruntukkan undang-undang kecil 86 hingga 108 undang-undang kecil Jumlah Bandaran Terengganu, adalah dengan ini dimansuhkan.

JADUAL PERTAMA
(UNDANG-UNDANG KECIL 40 (1))
MAJLIS DAERAH DUNGUN

LESEN

LESEN:

BIL. LESEN:

NAMA:

NO. K/P:

TEMPOH YANG DILESENKAN:

TEMPOH:

HINGGA:

SYARAT: Lesen ini dikeluarkan tertakluk kepada syarat-syarat berkembar.

Yang Dipertua
Majlis Daerah Dungun

BAYARAN LESEN: \$

BAYARAN PATIL: \$

LAIN-LAIN BAYARAN: \$

Jumlah: _____

RESIT

TARIKH

NO. RESIT

KOD

JUMLAH

JADUAL KEDUA
(UNDANG-UNDANG KECIL 40 (2))

LESEN GERAI PASAR

Jenis Gerai	Barang yang dijual	* Kadar Sebulan	
		A	B
1. Gerai yang dikunci	Semua jenis	\$ 30.00	\$ 50.00
2. Gerai Pasar	(a) Ikan	\$ 40.00	\$ 65.00
	(b) Daging	\$ 40.00	\$ 65.00
	(c) Buah-buahan/sayur-sayuran/telur/taufu	\$ 25.00	\$ 40.00
	(d) Barang-barang lain	\$ 25.00	\$ 40.00
3. Petak Penjaja (di dalam dan di luar)	Ikan/sayur-sayuran /buah-buahan	\$ 20.00	\$ 30.00
4. Ais	Ketul Ais	\$ 40.00	\$ 65.00
5. Kelapa	Kelapa Parut	\$ 20.00	\$ 30.00

(* Kadar A hendaklah terpakai bagi gerai-gerai di semua pasar yang sedia ada melainkan jika ditetapkan sebaliknya oleh Majlis dalam hal sedemikian maka kadar B hendaklah terpakai.

Kadar B hendaklah terpakai kepada semua pasar yang dibina selepas undang-undang kecil ini berkuatkuasa.

JADUAL KETIGA
(UNDANG-UNDANG KECIL 40 (3))

BAYARAN LESEN BAGI SETAHUN

(A)	Pasar persendirian:	
	(i) Luas lantai 70 meter persegi atau lebih	\$ 450.00
	(ii) Luas lantai kurang daripada 70 meter persegi	\$ 350.00
(B)	Pasaraya dan Pasar Mini:	
	(i) Luas lantai 86 meter persegi atau lebih	\$ 1,500.00
	(ii) Luas lantai kurang daripada 86 meter persegi	\$ 700.00

JADUAL KEEMPAT
(UNDANG-UNDANG KECIL 40 (4))

KADAR BAYARAN YANG KENA DIBAYAR OLEH
PENJUAL-PENJUAL DI PASAR AWAM

Jenis penjualan dan Tempat	Kadar Bayaran Yang Dikenakan
1. Tiap-tiap satu petak 1.32 meter x 1.32 meter	30 sen sehari.
2. Petak jualan berlonggok 2.64 meter x 2.64 meter	\$ 3.00 sehari.
3. (i) Tiap-tiap satu petak gerai	\$ 15.00 sebulan.
(ii) Tiap-tiap gerai di kawasan lapang	\$ 1.00 sehari.
4. Penjualan-penjualan beras	20 sen sehari bagi tiap-tiap seguni atau sebahagian daripadanya.
5. Penjualan-penjualan kayu api dan arang	60 sen sehari bagi tiap-tiap 100 ikat kayu api dan 28 sen bagi tiap-tiap 18 kampil arang.
6. Penjualan-penjualan pisang	50 sen sehari bagi tiap-tiap 10 tandan ke bawah dan 10 sen tiap-tiap tambahan.
7. Penjualan buah-buahan yang berpeti	20 sen bagi tiap-tiap sepeti.
8. Penjualan ayam dan itik hidup dalam sarang	10 sen bagi tiap-tiap seekor.
9. Penjualan-penjualan di sekeliling kawasan lapang	30 sen bagi tiap-tiap seorang penjual untuk satu petak.
10. Memunggah barang-barang jualan	(i) \$5.00 bagi sebuah lori besar. (ii) \$3.00 bagi sebuah lori kecil. (iii) \$2.00 bagi sebuah van.

Diperbuat oleh Majlis Daerah Dungun dalam mesyuaratnya pada 20 November 1991.
[MDD. 008/11/13.]

HAJI HARUN BIN ALI,
*Yang Dipertua, Majlis Daerah
Dungun*

Disahkan oleh Pihak Berkuasa Negeri dalam mesyuaratnya pada 16 Mei, 1993.
[SUK.TR. 1200/350/4; PUN.TR. (S) 85/3].

OSMAN BIN MUDA,
*Setiausaha,
Majlis Mesyuarat Kerajaan Negeri,
Terengganu*